
1 июнь – Халқаро болаларни ҳимоя қилиш куни. Болаларга беринг дунёни

Вилоятимизнинг барча туман-шаҳарларида “Ҳар бир болага меҳр, эътибор!” шиори остидаги махсус ҳафталик доирасида маънавий-маърифий тадбирлар, спорт мусобақалари ташкил этилмоқда.

Мазкур ҳафталик доирасида вилоят гимнастикага ихтисослаштирилган болалар ва ўсмирлар спорт мактабида 2006-2011 йилларда туғилган қизлар ўртасида спортнинг бадий гимнастика тури бўйича вилоят биринчилиги мусобақаси ўтказилди. Баҳсларда туман-шаҳарларнинг 90 нафардан зиёд сараланган спортчи қизлари иштирок этишди.

Ҳафталик доирасидаги байрам тадбирларида ижтимоий ҳимояга муҳтож, кам таъминланган, диний экстремистик оқим таъсирига тушиб қолган оила фарзандлари иштирокини кенг таъминлаш, уларнинг фаоллигини ошириб, рағбатлантиришга алоҳида эътибор қаратилди.

Қўштепа тумани “Ёшлар маркази”да “Бахтли болалик” лойиҳаси ўтказилди. Унга тумандаги умумтаълим мактаблари ўқувчилари, мактабгача таълим муассасалари тарбияланувчилари, ҳудуддаги кам таъминланган, боқувчисини йўқотган оила фарзандлари, ногиронлиги бор болалар таклиф этилди. Қўғирчоқ театри намоиши, турли аттракционлар хизмати ташкил қилинди, иштирокчиларга эсдалик совғалари улашилди.

Марғилон шаҳридаги 10-, 8-болалар мусиқа ва санъат мактабларида ҳудуддаги 21-, 25-, 15-, 8-умумтаълим мактаблари ва 1-ДИУМ ўқувчилари иштирокида бўлиб ўтган ижодий кечалар болажонлар байрамига бағишланди.

Кувасой шаҳридаги “Дўстлик” тўйхонасида ижтимоий ҳимояга муҳтож оилалар фарзандлари ва ногиронлиги бор болалар ўртасида ўтказилган “Мафтункор ранглар жилоси” номли расмлар танлови ҳам қизғин таассуротларга бой бўлди. Танлов ғолиблари ва 50 нафар фаол иштирокчилар муносиб рағбатлантирилди.

1-июнь куни вилоят марказидаги Аҳмад Фарғоний номли истироҳат боғида бепул маданий тадбирлар уюштирилиб, болажонлар иштирокида турли лойиҳа ва акциялар, қизиқарли ўйинлар, китоб ярмаркалари ташкил этилади.

Боғ мажмуаси майдончалари байрамона безатилади, боғ саҳнаси ҳам ўзгача кўринишга эга бўлади. Шу куни ҳар бир туман-шаҳарлардан ташриф буюрган фаол ёшлар, шунингдек, кам таъминланган оилалар фарзандлари, “Меҳрибонлик уйи” тарбияланувчилари учун барча кинотеатрларда миллий бадий фильмлар бепул намоиш этилади.

Дилнавоз ҚўЛДОШЕВА.

2018-05-31 12:23:57